

BAB 8 – PELBAGAI

Rayuan kepada Jawatankuasa LFX

1. Jawatankuasa LFX hendaklah mempunyai kuasa am untuk mendengar rayuan yang dibuat oleh pihak yang terkilan terhadap apa-apa keputusan yang dibuat oleh mana-mana Jawatankuasa Spesifik atau wakilnya. Keputusan jawatankuasa LFX mengenai rayuan tersebut adalah muktamad dan mengikat.

Nota Amalan

2. LFX hendaklah mempunyai kuasa untuk mengeluarkan nota amalan bagi menjelaskan, memperincikan atau menghuraikan mana-mana peruntukan dalam Kaedah-kaedah ini.
3. LFX hendaklah, dengan secepat yang dapat dilaksanakan, memberitahu Penganjur Penyenaraian dan Ejen Perdagangan mengenai pengeluaran nota amalan tersebut.

Pindaan kepada Kaedah-kaedah ini

4. LFX boleh meminda mana-mana peruntukan dalam Kaedah-kaedah ini. LFX hendaklah, dengan secepat yang dapat dilaksanakan, memberitahu Penganjur Penyenaiaan dan Ejen Perdagangan mengenai pindaan tersebut.

Prosedur jika tiada prosedur ditetapkan

5. Jika apa-apa perbuatan atau langkah dikehendaki supaya dilakukan atau diambil di bawah Kaedah-kaedah ini, dan tiada borang atau prosedur ditetapkan sama ada dalam Kaedah-kaedah ini atau nota amalan, permohonan boleh dibuat kepada LFX untuk arahan berkenaan dengan cara yang dengannya perkara tersebut boleh dilakukan atau diambil, dan apa-apa perbuatan atau langkah yang dilakukan atau diambil mengikut arahan tersebut hendaklah menjadi pelaksanaan yang sah bagi perbuatan atau langkah tersebut.

Penepian dan Pengubahsuaian

6. LFX boleh mengetepikan atau mengubah suai mana-mana peruntukan dalam Kaedah-kaedah ini, sama ada secara am atau untuk menyesuaikan dengan hal keadaan sesuatu kes tertentu.
7. Permohonan untuk penepian atau pengecualian tersebut boleh dibuat secara bertulis kepada LFX, sama ada bersama dengan permohonan yang relevan kepada LFX atau pada bila-bila masa selepas itu.

Pengemukaan Dokumen

8. Semua maklumat dan dokumen yang dikemukakan kepada LFX bagi apa-apa maksud di bawah Kaedah-kaedah ini mestilah dalam Bahasa Inggeris atau disertakan bersama suatu terjemahan Bahasa Inggeris yang diperakui sebagai tepat oleh seseorang yang boleh diterima oleh LFX.
9. Apa-apa akaun atau penyata kewangan yang dikehendaki supaya dikemukakan kepada LFX bagi apa-apa maksud di bawah Kaedah-kaedah ini mesti disediakan dan diaudit mengikut piawaian perakaunan dan pengauditan yang diiktiraf pada peringkat antarabangsa dan yang boleh diterima oleh LFX.

Notis oleh LFX

10. Apa-apa notis sebagaimana yang dikehendaki di bawah Kaedah-kaedah ini supaya diberikan oleh LFX kepada Penganjur Penyenaraian atau Ejen Perdagangan hendaklah disifatkan sebagai telah diberikan dengan sewajarnya kepada Penganjur Penyenaraian atau Ejen Perdagangan itu apabila dihantar kepada alamat, nombor faksimile atau alamat mel elektronik Penganjur Penyenaraian atau Ejen Perdagangan tersebut sebagaimana yang direkodkan dalam daftar yang disimpan oleh LFX menurut Kaedah 17 Bab 3.
11. Melainkan jika komunikasi terus dengan penerbit diperuntukkan secara spesifik, apa-apa notis sebagaimana yang dikehendaki di bawah Kaedah-kaedah ini supaya diberikan oleh LFX kepada penerbit boleh diberikan oleh LFX kepada Penganjur Penyenaraian penerbit itu.

Pengecualian Liabiliti

12. LFX, Jawatankuasa LFX dan wakilnya, Jawatankuasa Spesifik dan mana-mana wakilnya dan mana-mana pegawai LFX, menafikan apa-apa liabiliti terhadap atau oleh sebab, atau berkenaan dengan, apa-apa perbuatan yang dilakukan atau pernyataan yang dibuat, atau yang ditinggalkan daripada dilakukan atau dibuat, menurut atau dalam pelaksanaan kuasa dan fungsinya di bawah Kaedah-kaedah ini.

Kerahsiaan Maklumat

13. Maklumat dan dokumen yang dikemukakan kepada LFX yang berkaitan dengan aktiviti LFX, boleh ditetapkan oleh LFX sebagai sulit. Maklumat sulit tersebut tidak boleh didedahkan kepada mana-mana pihak kecuali sebagaimana yang dikehendaki oleh undang-undang.

Tafsiran Kaedah-kaedah

14. Apa-apa persoalan mengenai tafsiran Kaedah-kaedah hendaklah diputuskan oleh Jawatankuasa LFX, yang keputusannya adalah muktamad dan konklusif.

Notis Data Peribadi

15. Mana-mana orang yang memberikan atau yang telah memberikan data peribadi kepada LFX menurut atau berkaitan dengan Kaedah-kaedah ini sepatutnya membaca dan menyedari pemberitahuan relevan yang berhubung dengan Akta Perlindungan Data Peribadi 2010 ("**PDPA**") yang boleh didapati pada laman web LFX pada pautan <http://lfxsys.lfx.com.my/> ("**Notis Data Peribadi**").
16. Jika data peribadi yang diberikan ialah data seseorang individu lain ("**subjek data**"), orang yang memberikan data tersebut mesti telah memberitahu subjek data secara bertulis mengenai Notis Data Peribadi sebelum memberikan data peribadi itu, melainkan jika:
 - (a) seksyen 41 PDPA terpakai; atau
 - (b) LFX menentukan perkara yang sebaliknya berkaitan dengan PDPA.
17. Bagi maksud perenggan ini, "**data peribadi**" hendaklah mempunyai maksud yang sama sebagaimana yang diberikan dalam seksyen 4 PDPA.